

齊故尚書右僕射冀州使君封公墓誌銘

公諱子繪，字仲藻，勃海脩人也。高基與積石同峻，靈源共委水爭長。蓋以暉煥前經，可得而略。祖司”空孝宣公。父太保宣懿公。並器重德尊，功成事立，畫像台閣，配食宗社。公摛光漢滋，孕彩昆丘，無忝”良弓，克荷堂構。軒蹄欲騁，大丙之駕可追；撫翼將飛，姑余之望何遠。於是英聲允集，光價攸歸。雖在”兩髦之中，實弘四嶽之量。起家秘書郎中，濯纓已即，利賓伊始，緇素載序，廣內增華。既而魏道將季，”群凶作梗，勢甚東遷，禍同南闕。太祖獻武皇帝選徒誓眾，雷動晉陽，戎車東指，將清王略。公發自”信都，迎於釜口，亦既見止，□得其人。即署開府主簿。俄而相府崇建，仍為丞相主簿，加伏波將軍，掌”文墨。魏武之征巴漢，書檄專委楊脩；晉文之討淮南，軍謀唯在鐘會。儔今望古，差可寄言。中興初，除”左將軍散騎常侍，在通直，領中書舍人。豐貂右插，清蟬高映，既光侍從之儀，又兼敷奏之敏。稍遷征”南將軍光祿大夫。金章紫綬，復為通直常侍，又兼黃門侍郎。天平中，除衛將軍右光祿大夫，常侍如”故。出為平陽太守，加散騎常侍當郡都督。尋征大行台吏部郎中。所奉之主，太祖其人也。武定三”年丁太保公憂。孺慕泣血，杖不能起。九日不入水漿，三年未嘗鹽酪。太祖西征，征公大都督，復居”吏部郎中，尋為勃海太守。公威著言前，化行令表，亂繩自解，佩牘斯除。襲爵安德郡開國公，又加散”騎常侍，增秩一等。轉驃騎將軍，余官如故。天保初，入為太尉長史。其間再行南青，一行南哀事。六年，”除使持節都督海州諸軍事本將軍海州刺史。未及之任，朝廷以合肥衝要，地在必爭，取威馭眾，非”公莫可，改授都督合州諸軍事合州刺史。九年，遷鄭州諸軍事鄭州刺史。所在樹政宣風，德音潛被，”民歌來暮，物有去思。十年，征為司徒左長史，仍行魏尹事，幹明初，除司農大卿，尋正京尹。皇建中，加”驃騎大將軍。大寧二年，除都官尚書，尋行冀州事。先日，司空太保二公並臨冀部。至是公複行焉。三”葉本嶽，世論歸美。公開瞻望境，露錦還鄉，竹馬盈途，壺漿塞路。河清二年，除儀同三司。三年，暫行懷”州事。尋轉七兵尚書，仍換祠部。其年閏九月二十日邁疾終於京師，春秋五十二。公家傳鐘鼎，世紐”龜符，蔭籍清華，地望凝簡。金張蟬珥，彼自一時，楊袁公輔，我無多愧。而謙以自勖，貴不在身。車徒約”素，服用單儉。財酒聲色，勝達恒情。四者之來，在公非或。加以網羅百氏，綜涉六經，雅練朝章，尤悉治”典。激察之行，每有恥而弗為；雕蟲小技，固壯夫之所忽。驟總連率，頻作納言。再司河輔，累遊槐棘。蹤”跡盈於廊廟，佐吏遍于四海。愛箸歌謠，道光存沒。嘉聲與東川競遠，勝範共南嶽俱傳。方當改觀台”筵，增暉揆席，倏見捐珠，遽看罷市。詔贈使持節都督冀瀛二州諸軍事本將軍冀州刺史開府儀”同三司尚書右僕射，開國如故。以大齊河清四年歲次乙酉二月甲寅朔七日庚申歸窆於先公之”舊塋。嗚呼，黃廬一

閉，玄夜無期。從弟孝琰以為陸機之誅士平，情則兄弟；潘嶽之哀茂春，事實昆季。”是以謹撰遺行，用裁志序。所恨少長懸隔，聚散閑之，素業貞猷，百不舉一。吏部郎中清河崔瞻與公”禮闈申好，州裡通家，摛綴之美，籍甚河朔。敬託為銘，式昭不朽。其詞粵：”衡漳帶地，渤海浮天，炳靈斯在，世濟推賢。丹青奄映，篆素蟬聯，兩河無絕，三古相傳。晉季擁旄，燕垂”避世，借資時雄，策名專制。中原重造，簪纓有系，衰職更新，緇衣改弊。牧此冀方，三葉重光，俱銘鼎鉞，”並載旗常。仍傳遠駕，克構層堂，曜卿之子。公業不亡。振彩藍田，楊芬桂簿，曾是蘊價，實唯天爵。望雲”高漸，臨淵載躍，揆藻王庭，讎書麟閣。掩紘河朔，授鉞參墟，蛇靈競爽，龍翼爭攄。耿弇奉騎，彊華獻書，”妙同先覺，爰託後車。載筆行署，參儀幕府，密勿負閣，劬勞省戶。一入紫宮，頻垂朱組，朝諮砥礪，士觀”規矩。絳水自清，潢池有兵，臥治本國，主諾堯京。龔朱埒美，邵杜齊名，教司俟贊，槐路揚聲。出總蕃麾，”入清京輦，遺蹤列棘，比威金鉉。文劍橫腰，納言承冕，三階未協，六符方辯。海運不停，鵬圖奄駐，誰謂”藏山，忽歌晞露。桃蹊一斷，松風將暮，朝野躊躇，潛焉相顧。永言知己，追懷若人，友朋世篤，鄒魯相親。”行憂昔狀，德重先民，含毫雪涕，豈究清塵。”世子左丞相府參軍事寶蓋，次子寶相。河北景縣出土，見《考古通訊》一九五七年第三期《河北景縣封氏墓群調查記》。